

# SARS E LEFA DIPUSETSO TSA TJHELETE E KANA KA R2.4 BILLION KA NAKO ENA YA THIBELO

**Pretoria, Mantaha wa la 30 Tlhakubele 2020** – Afrika Borwa jwalo ka dinaha tse ding tse ngata lefatsheng e ntse e tswela pele ho lwantshana le ho thefuleha ha ikonomi le hwa bophelo bo botle ho bakwang ke sewa sa COVID 19. SARS e e fadimehetse ditlamorao tse mpe tsa sena maphelong a batho ba rona mmoho le kotsi e tjamelaneng le kgwebo le ikonomi e ntseng e hula ka thata. Ka lebaka la seo, re itlamme ho dula re ntse re tswela pele ka ditshebeletso tsa bohlokwa tsa SARS e le ho lwantshana le boemo bona bo seng botle.

Ho phethahatseng boikarabelo bona, SARS e leka ho tsepamisa polokeho ya basebetsi ba rona, balefalekgetho le bahwebi ka ho netefatsa hore ikonomi ya rona e kgona ho sebetsa. Ho tloha kajeno, SARS e se e lefile balefalekgetho dipusetso tsa tjhelete e kana ka R2.4 billion matsatsing a mane a thibelo, haesale ho tloha ka Labohlano la 27 Tlhakubele.

Dipusetso di akaretsa ditefo tse entsweng ho Dikgwebo tse Kgolo tsa tjhelete e kana ka R1.1 billion mmoho le ditefo tse entsweng ho Dikgwebo tse Nnyane, tse Mahareng le tse Nnyan-nnyane (SMMEs) tsa tjhelete e kana ka R1.3 billion.

Tefo ya dipusetso tsena ke sesupo sa ho kena ha tjhelete e kgolo ka hara ikonomi ka nako eo sena se hloka halang haholo. SARS e ka kgona ho etsa sena ha feela e le hore balefalekgetho le bahwebi ba dula ba ntse ba ikobela boitlamo ba bona ba ho faela le ho lefa lekgetho la bona le ka nako tsena tsa thibelo.

SARS e entse hore ho be le metjha ena e latelang ya inthanete, yona ke, MobiApp, eFiling, e@syFile, imeile le SARS Contact Centre (0800 00 7277) hore di tle di sebedisetswe boitlamo bona.

Balefalekgetho le bahwebi ba koptjwa ho sebedisa metjha ena ho etsa ditefo tse kolotuwang ka la kapa pele ho la 31 Tlhakubele 2020 le hore ba dule ba le boemong bo botle ba boikobelo ba tefo ya lekgetho.

Ke taba ya bohlokwa hore mekgahlelo e fapaneng ya dikgwebo e iphumanang e le mathateng le yona e dule e ikobela tefo ya lekgetho hore di tle di tsebe ho fumana thuso ya mehato ya kimollo ya lekgetho eo mmuso o tlileng ka yona ho lwantshana le ditlamorao tsa sewa sena sa COVID-19.